



FUTURO

INDICE

Introduccion	3
Ideologia	4
I. GOBERNACION EFICIENTE Y RESPONSABEL PA TUR	
Bon Gobernacion	6
Finanzas Publico Responsabel	8
Relacion Mas Efectivo den Reino	9
II. DESAROYO SOCIO-ECONOMICO PA TUR	
Reduci Costo di Bida y Mitiga Pobreza	11
Garantisa Vivienda Pagabel	12
Reduci E Gasto di Haci Negoshi	13
Modelo Turistico Beneficioso	14
III. SALUD, BIENESTAR E INCLUSION PA TUR	
Salud General	16
Suficiente Cuido y Entrada pa Adulto Mayor	17
Transporte, Inclusion y Bario	18
Hunentud y Deporte	19
IV. EDUCACION Y LABOR PA TUR	
Educacion	21
Labor	23
V. SIGURIDAD PA TUR	
Husticia	25
Siguridad di nos animalnan	26
VI. SOSTENIBILIDAD PA NOS TUR	
Transicion di Energia	28
Cuido di Medio Ambiente	29
VII. INDUSTRIA CREATIVO PROSPERO PA TUR	
Industria Creativo	31
VIII. SAN NICOLAS PA TUR	
San Nicolas	33
IX. ORANJESTAD PA TUR	
Oranjestad	36

INTRODUCCION

Nos isla a pasa den un desaroyo grandi y contradictorio den ultimo tres decada. Aunke a stimula e crecemento economico (sin limite) y turismo tabata e factor dominante di politica, e indicadornan social a keda hopi atras

E vision necesario riba largo plaso no a ricibi suficiente atencion y nos problemanan mas grandi ta sigui sin haya un solucion definitivo. Inseguridad y desconfiansa den gobierno a bira algo normal den nos realidad

Awor nos ta para dilanti di un serie grandi di desafio; di finanzas publico te vivienda, y embebecimento di poblacion te na scarsedad structural di hende pa traha. Mescos cu pobreza y hopi problema social, lo tuma algun periodo di gobernacion prome cu un maneho nacional por trece orden y resolve e problemanan structural cu ta grandi y profundo

Como representante di nos pueblo, nos mester gana e confiansa bek di e ciudadano door di tene y mantene un interaccion saludabel entre gobierno y comunidad pa por cumpli cu e necesidadnan social. Pa logra esaki, comunicacion constructivo y transparencia ta un exigencia pa un trato respetuoso den Parlamento

Nos mester sinta pensa hunto riba e futuro cu nos ta desea en comun. Awo y den futuro, mester percura pa duna sosten na esunnan mas vulnerabel. Di mesun forma, mester pone meta pa un futuro sostenibel pa e generacionnan venidero, pa tur hende por disfruta di un bida digno na Aruba

Basa riba nos compas moral y accionnan noble, ban crea un comunidad cu ta resiliente, cu ta proactivo den trece solucionnan sostenibel pa futuro; haciendo uzo di participacion, innovacion social y desaroyo personal. Tur esaki den liña cu nos norma y balornan, cu garantia di husticia social, decisionnan transparente y responsabel di parti di nos gobernantenan

IDEOLOGIA

E partido aki tin como meta general y den particular:

- A. Ta un movimiento politico progresivo, cu ta nace for di e forsa di e individuo y cu ta manifesta su mes door di transparencia, responsabilidad, respet, integridad, libertad y confiansa;
- B. Trahando pa un gobernacion efectivo y eficiente, cu pa medio di inclusion y integridad ta crea e miho condicionnan economico y social pa e comunidad Arubano

Gobernacion Eficiente y Responsabel pa TUR



BON GOBERNACION

Kico Nos Ta Wak: Bon gobernacion ta esencial pa e funcionamiento di nos estado di derecho y democracia. Sin bon gobernacion, no por tin confianza di pueblo den su representantenan. Pa gobierno por cumpli cu e necesidadnan social di comunidad lo rekeri confiansa y participacion constructivo di e ciudadano pa por logra meta proponi, algo cu na e momentonan aki mester mehoracion

Kico Ta Nos Vision: E manera con e aparato publico ta uza poder y ta duna acceso na servicio publico mester ta transparente, efectivo y husto. Gobierno den su totalidad mester ta integro, mester percura pa un trato corecto y husto; semper basa riba nos leyman y maneho

Prioridad y Kico Nos Kier Haci:

Maneho transparente y efectivo:

- Mester trata tur peticion pa permiso dentro di 6 siman desde cu a entrega e peticion (dentro di 18 luna despues cu gobierno nobo sinta)
- Reorganisacion di LAR bezwaaradvies commissie pa logra cu LAR por duna su conseho dentro di e periodo stipula pa ley
- Institui un estructura di dialogo cu gremionan, stakeholders y comunidad ora di introduci ley y maneho cu impacto administrativo of financiero pa comunidad
- Introduccion di Ley di Archivo (Archiefwet) pa promove transparencia y sigura cu tur documento ta registra, cataloga y documento publico ta publica
- Sostene y fortalece e funcionamiento independiente di e Ombudsvrouw(man)
- Introduci un Ombudsman pa proteccion di derecho di mucha
- Introduci eCodigo di Gobernansa

Mehora funcionamiento di Parlamento:

- Introduci unCodigo di Conducta pa Parlamento
- Modernisacion di Reglamento di Ordo
- Introduci un curso obligatorio di derecho constitucional y administrativo (staats-en bestuursrecht) pa tur parlamentario
- Percura pa parlamentario haya asistencia ora di traha ley di iniciativa
- Independisacion di Parlamento
- Introduci periodo maximo di 2 siman pa minister contesta pregunta di parlamentario
- Publicacion di tur ley aproba pa Parlamento di Aruba
- Publicacion di tur mocion presenta na Parlamento di Aruba

Miho funcionamiento di tur compania estatal:

- Introduci ley di Good Corporate Governance
- Introduci perfil di funcion, proceso transparente di solicitud y nombramento di director y comisario
- Aprobacion di cuenta anual na tempo
- Inspeccion (doorlichting) cada 5 aña
- Introduci un maneho sucursal (deelnemingenbeleid)
- Introduci un maneho di dividendo (dividendbeleid)
- Evalua e efectonan di e Landsverordening normering topinkomens pa posibel adaptacion cu ta evita cu nos profesionalnan ta bay of no kier bin traha na Aruba

FINANZAS PUBLICO RESPONSABEL

Kico Nos Ta Wak: Pa surpasa e retonan cu Covid a trece pa economia y finanzas publico di Aruba, a hisa BBO y a introduci BBO na frontera. Awor nos ta wak cu economia a recupera y entrada di impuesto ta stabiel. Sinembargo, e nivel di prijs di producto ta halto y gasto di haci negoshi ta halto

Kico Ta Nos Vision: Nos ta wak espacio pa reduci gasto di gobierno, tanto operacional, di personal y di interes di fianza, pa asina crea espacio financiero pa reduci costo di bida y stimula poder di compra y inverti bek den Aruba. Un sistema fiscal moderno y husto, cu suficiente facilidad pa e sector comercial, un miho proteccion legal pa tur contribuyente y menos obligacion administrativo posibel. Presupuesto mester ta e base di un gobierno eficaz y eficiente cu un maneho basa riba vision. Mediante legislacion, e presupuesto anual mester ta balansa

Kico Nos Kier Haci:

- Inicia un dialogo fiscal cu tur stakeholders pa reforma full Aruba su sistema di impuesto pa logra cu e husto pa tur hende, simpel y eficiente y sin tanto obligacion administrativo; unda e accento mester ta pa bay di impuesto directo pa indirecto y unda nos lo haci Aruba atractivo como centro di inversion den Caribe y Latino America. Mester inicia e discusion cu tur stakeholders pa reemplaza BBO cu BTW, pa e.o. elimina e caracteristica cumulativo di BBO
- Finalisa introduccion di un rijskwet riba supervision financiero pa garantiza financiamiento cu interes mas abou y logra reduci e peso di interes y prestamo pa Covid cu Afl. 39.5 miyon pa año 2025 y 48.3 miyon pa año 2026
- Logra pa Hulanda refinancia e resto di e debe nacional cu institutonan financiero na Merca y na Aruba pa sigui reduci drasticamente e peso di interes y asina crea mas espacio financiero
- Reduci gasto di operacion di gobierno (goederen en diensten) cu 10% y logra asina reduci e gasto cu Afl. 22 miyon pa año
- Establece un limite pa gabinete di minister di maximo shete (7) ministerio
- Completa tur relato financiero anual pa eherce un miho control presupuestario
- Reduci e dlanan dentro di cual gobierno ta paga tur su proveedor di 90 dia pa 30 dia, cu lo stimula economia, duna empresario chikito tambe e posibilidad y reduci e prijs pa cual gobierno ta cumpra for di sector priva
- Fortalece Aduana cu scanners y tecnologia pa mehora eficiencia
- Reduci gasto di personal di gobierno door di digitalisacion
- Automatiza y centralisa TUR proceso di permiso; "One-Stop-Shop" pa permiso comercial, mehora synergia y colaboracion entre departamentonan concerni
- Programa di inversion pa stimula GDP y un crecimiento economico cu un base capitalisa
- Incorpora un sovereign wealth fund pa Aruba pa inverti un parti di entrada di Aruba pa futuro

- Separacion di tarea na Directie Financien pa mehora transparencia y pa un servicio eficiente y eficaz pa ciudadano:
 - Funcion di pago / funcion di entrada
 - Funcion presupuestario → departamento separa
 - Funcion di financiamiento → encarga CBA

RELACION MAS EFECTIVO DEN REINO

Kico Nos Ta Wak: Pandemia a genera relacion y oportunidad nobo di colaboracion den Reino. Esakinan ta ofrece hermentnan cu por uza pa logra un futuro sostenibel y duradero pa tur ciudadano y Aruba

Kico Ta Nos Vision: Demuestra cu Aruba ta un partner serio y confiabel den Reino y cu Aruba kier traha hunto cu tur otro pais den Reino y asina aumenta e posibilidadnan di cooperacion cu Reino Hulandes ta ofrece

Kico Nos Kier Haci:

- Finalisa y formalisa e negociacionnan cu Hulanda pa refinancia e debe nacional cu Hulanda y e obligacionnan di PPP (Public Private Partnership projects)
- Aumenta temporalmente asistencia tecnico pa varios departamento di gobierno
- Agilisa e ehecucion di e programa di Landspakket y explora su expansion
- Haya acceso na fondo Hulandes pa promove desaroyo sostenibel
- Fortalece e cooperacion den Reino pa cu comercio, agricultura, salud, husticia (migracion), educacion, Union Europeo y e transicion di energia
- Participacion na misionnan comercial di Reino Hulandes
- Expande presencia di Arubahuis y Aruba su minister plenipotenciario na Hulanda
- Mas cooperacion cu municipionan Hulandes
- Mas cooperacion cu e agencianan coordinado di Hulanda pa haya acceso na fondonan Europeo y fondonan Hulandes

Desaroyo Socio-Economico pa nos TUR



REDUCI COSTO DI BIDA

Kico Nos Ta Wak: (i) Poder di compra di tur ciudadano a bay drasticamente atras e ultimo añanan, (ii) prijs di producto den supermercado a bira hopi caro, (iii) ta practicamente imposibel pa un famia jong yega na su mesun hogar y (iv) prijs di combustibel, awa y coriente ta hopi halto. Consecuencia di esaki ta cu hopi ciudadano mester traha mas cu un trabou pa por sobrevivi y pa por cria nan famia y purba tin un bida digno

Kico Ta Nos Vision: Un Aruba unda tur ciudadano tin e posibilidad pa tin un entrada cu ta yega pa paga su vivienda, cuminda, utilidad, transporte y tur necesidad basico y ainda resta algo pa recreacion. Un bida digno pa tur ciudadano. **NOS VISION TA PA HIBA E RIKESA DI NOS PAIS DEN CADA HOGAR**

Nos lo percura pa den e prome 3 lunanan di gobernacion implementa cambionan cu lo duna e ciudadano extra placa di biaha den su man pa mehora su poder di compra, pues solucion real cu impacto directo. Den e di cuater, cinco y seis luna di gobernacion nos lo implementa cambio cu ta mehora e poder di compra na un forma structural

Kico Nos Ta Bay Haci durante e prome 3 lunanan di e gobernacion

- Baha prijs di gasolin den e prome luna di gobernacion door di elimina un schakel di BBO riba gasolin pa tur ciudadano resta mas placa den su man direct
- Reduccion di loonbelasting pa e ciudadano resta mas placa direct
- Amplia e belastingvrije voet pa menos hende mester declara inkomstenbelasting y asina resta mas placa direct
- Aumento di e reparatietoeslag na un forma responsabel pa e pensionado tin mas placa direct
- Aumento di e reparatietoeslag pa e persona cu ta gana salario minimo pa e tin mas placa direct
- Inicia dialogo riba cambio di e balor defini di producto na frontera pa cobra impuesto di importacion (invoerrecht)

Kico Nos Ta Bay Haci durante luna 4, luna 5 y luna 6 di e gobernacion:

- Amplia e capacidad di solar panels cu un cas mag di tin riba su dak pa baha su gasto mensual di coriente y percura pa haci e keuring di solar panels den un periodo di 4 siman despues di instalacion
- Inverti den e sector di agricultura comercial pa aumenta e produccion local di fruta, berdura y webo, den colaboracion cu otro paisnan
- Percura pa tur scol haya e maximo capacidad di solar panels pa reduci nan consumo di coriente cu por wordo uza pa cubri aircogeld y schoolgeld y asina baha e gasto pa e mayornan
- Programa pa subsidia instalacion di solar panels pa esun di menos recurso pa e grupo aki tambe por beneficia di coriente mas barata y cuminsa traha riba e transicion di energia pa tur hende na Aruba

GARANTISA VIVIENDA PAGABEL

Kico Nos Ta Wak: Pa mayoria di hende ta birando imposibel pa yega na un propio cas. Prijs di tereno y cas pa cumpra ta impagabel pa e ciudadano cu un entrada modesto y mediano. DIP tin un atraso enorme den otorgamento di tereno erfpacht pa local por traha un cas

Costo halto di material di construccion y labor ta hisa e prijs di cas. Exigencia halto di 'eigen inbreng' door di banco ta haci'e mas dificil ainda pa e ciudadano yega na su propio cas. E ultimo añanan tin hopi demanda di persona cu no ta residencia na Aruba cu ta cumprando cas pa huur cu turista, loke a pone cu prijs di cas a subi ainda mas y ta limita e casnan cu ta keda pa nos ciudadanonan. E beneficio di un plataforma manera Airbnb mester ta pa local

Kico Nos Kier Haci:

- Introduci un ley cu ta limita e no-residente di cumpra cas na Aruba (dentro di 6 luna cu gobierno nobo sinta)
- Percura pa tur vacation rental ta registra y somete nan bou supervision di siguridad, salubridad y calidad (dentro di 6 luna cu gobierno nobo sinta)
- Percura pa tur vacation rental paga nan belasting segun ley ta stipula
- Destina entrada di belasting di vacation rentals pa programa di subsidio pa construccion di vivienda mixto pa adulto mayor y hoben
- Aumenta tarifa di grondbelasting pa doño no-residente di propiedad
- Restructura DIP y inicia programa nobo di otorgamento di tereno erfpacht na local y procesa tur peticion pendiente (dentro di 12 luna cu gobierno nobo sinta)
- Digitalisa e proceso di DIP pa evita maluso y publica tur otorgamento pa mas transparencia
- Tuma bek tur tereno erfpacht cu of sin cas, cu ta bandona y unda construccion no a cuminsa of termina pa reemiti esaki na esunnan cu mester un tereno y, si por, termina e construccion di un cas
- Stimula doñonan di edificio den centro di San Nicolas y Oranjestad pa converti e segundo piso den vivienda ofreciendo un subsidio di huur na e huurdo y un deducccion pa inversion adicional
- Converti scolnan bandona den vivienda mixto pa hoben y adulto mayor
- Permite APFA duna prestamo na interes reduci na FCCA pa construccion di vivienda social
- Amplia e suma cu Fondo di Garantia ta duna pa cubri e eigen *inbreng*

REDUCI E GASTO DI HACI NEGOSHI

Kico Nos Ta Wak: Prijs di utilidad halto, prijs di combustibel halto, prijs di labor halto, prijs di real estate halto, sea huur of cumpra y costo di financiamiento y productonan financiero halto y un gobierno ineficiente cu no ta emiti su permisonan na forma rapido y eficiente, tin como consecuencia cu gasto di haci negoshi ta halto y prijs di producto y servicio tambe ta halto. Na final di dia e comerciante mester calcula tur e gastonan aki den su prijs y mirando cu mayoria producto ta bin di afo cu un prijs halto caba, e producto pa e consumidor ta birando impagabel. E tempo cu Aduana ta tuma pa laga producto di importacion liber ta largo

Kico Ta Nos Vision: Percura cu e structura di gasto di negoshi ta eficiente pa e empresario por tin un negoshi caminda e por ofrece su producto of servicio na un prijs competitivo y e por gana un margen di ganashi aceptabel. Un gobierno eficiente y transparente cu ta emiti tur permiso dentro di un periodo di 6 siman desde e momento di entrega di e peticion y un sistema di belasting cu ta husto y eficiente, tambe pa e comerciante, sin tanto peso administrativo

Kico Nos Kier Haci:

- Inicia un dialogo pa yega na un reforma fiscal integral y husto, incluyendo inicia e dialogo cu tur stakeholders pa sondea e apoyo pa reemplaza BBO cu BTW, baha e peso administrativo, simplifica e sistema di impuesto y haci esaki mas eficiente
- Reforma di e ley di impuesto di importacion
- Percura pa e comerciante haya su producto mas lihe for di Aduana
- Introduccion di un "one-stop-shop" pa comerciante: un loket central y digital caminda ta entrega y procesa tur peticion (vestigingsvergunning, restaurantvergunning, werk- en verblijfsvergunning, bouwvergunning, manpowerplanning, personeelsopgave, etc.) y tereno pa destino comercial
- Percura cu ta trata tur permiso den 6 siman despues cu a entrega peticion (dentro di 18 luna cu gobierno nobo sinta)
- Baha prijs di gasolin y diesel den e prome luna di gobernacion door di elimina un schakel di BBO riba gasolin pa reduci e gasto di combustibel pa tur negoshi direct
- Amplia e capacidad di solar panels cu un negoshi mag di tin riba su dak pa baha su gasto mensual di coriente y percura cu ta haci e keuring den un periodo di 4 siman despues di instalacion
- Percura pa introduci e dos leyman cu Banco Central di Aruba a prepara pa regula e tarifanan cu banco comercial ta cobra y pone un suma maximo pa uzo di plataforma di transaccion internacional
- Introduccion di un plataforma nacional di pago entre banconan local y Banco Central di Aruba pa baha e gasto di transaccion

MODELO TURISTICO BENEFICIOSO

Kico Nos Ta Wak: E desaroyo di e industria turistico ta di vital importancia nos economia, pero mester un evaluacion urgente debi na e presion cu e sobredesaroyo di e sector aki tin riba nos medioambiente, infraestructura y comunidad. E dependencia grandi riba trahado stranhero pa satisface e demanda turistico ta aumenta e presion pa acceso na vivienda pagabel, cuido medico, transporte, scol, nos comunidad, nos cultura y mas

Kico Ta Nos Vision: Un maneho di turismo sostenibel ta esencial pa crea un balans entre crecemento economico y e preservacion natural y cultural di Aruba, ademas di e bienestar social pa futuro generacion. Introduccion di un paro na mas desaroyo, y alabes diversifica y mehora e mercado turistico existente, mientras ta alinea e oferta di educacion local cu e demanda laboral di e sector

Kico Nos Kier Haci:

- Moratorium - pone un paro completo - no mas hotels, no mas camber no mas condominiums
- Publica tur permiso cu ta vigente ainda pa construccion y tur cu ta den proceso pendiente decision
- Establece curso pa local desaroya nan capacidad y habilidad den e sector di servicio pa yena cupo di trabou y pa brinda un miho experiencia na nos bishitantenan - y pa reduci e necesidad pa importa mas trahado di exterior
- Introduci e rekisito di Corporate Social Responsibility den sector hotelero pa mitiga su impacto social y riba nos medio ambiente
- Stimula produccion local di fruta y berdura pa consumo di sector turistico
- Incentiva stakeholders pa inverti den e aspecto vocacional y educacional di nos scolnan pa e trabounan necesario den e sector turistico
- Atrae mas "niche" tourism, specialmente cu enfasis riba cultura, arte y deporte

Salud, Bienestar y Inclusion pa TUR



SALUD GENERAL

Kico Nos Ta Wak: Desafionan grandi den e tereno di salud y cu ta afecta nos tur, ta inclui scarsedad di personal medico capacita, presion riba e sistema medico door di embebecemento di poblacion, aumento di malesa (cronico) ocasiona door di sobrepeso y stress, etc. Tambe tin presion door di e poblacion di persona indocumenta y crecimiento di turismo. Tin necesidad pa inverti den modernisacion di tecnologia medico

Kico Ta Nos Vision: Analisa e espacio financiero (surplus) di AZV y identifica y introduci un plan structural y integral pa inverti den salubridad publico bek. A traves di e compromiso social y cooperacion (regional), nos kier wak un futuro den cual tur residente y bishitante di Aruba tin acceso garantiza na cuida medico di calidad halto y na bon salud. Nos mester construi un sistema di salud mas resiliente pa tur riba e isla

Kico Nos Kier Haci:

- Atencion debido pa structura e procesonan den e cadena di servicio di salubridad
- Analisa y inicia e proceso di modernisa pakete di AZV cu desde 2000 no a conoce un actualisacion
- Introduci lista positivo di remedi pa AZV cu ta cubri tur remedi pa nos adultonan mayor
- Introduci proyecto cu asistencia di profesional di exterior pa baha tempo di espera na policlinicanan di diagnostico, en special di bista, MRI, y MDL (stoma, tripa y higra)
- Mas prevencion pa medio di stimula y informa comunidad riba miho structura di bida y alimentacion debido
- Introduci cuida psicologico den e cobertura basico di AZV
- Explora cambio den e structura di tarifa pa cada pashent y baha e cantidad di cliente pa cada dokter di cas
- Intensiva y mehora e structura di cooperacion entre Hospital y Centro Medico
- Restaura e colaboracion di sector di salubridad cu EPI den un programa ahusta na e vacaturanan den sector medico
- Investigacion pa acuerdo di trabou colectivo (CAO)
- Ahuste di salario door di inflacion y beneficio laboral secundario adecua
- Fortalece colaboracion internacional y den Reino
- Mayor cooperacion, comunicacion y coordinacion entre institucion gubernamental y manejo di crisis
- Fomenta innovacion y expansion di e capacidad hospitalario.
- Inventarisa necesidad y cantidad di servicio di fisioterapia cu ta ofrece cu posibilidad di ahusta na e cantidad di tratamiento cu ta duna
- Cambio den ley pa surplus di AZV por bay bek den caha di gobierno

SUFICIENTE CUIDO Y ENTRADA PA ADULTO MAYOR

Kico Nos Ta Wak: Poblacion di Aruba ta subiendo den edad, na aña 2025 27.2% di nos populacion lo ta di edad 60+, loke ta aumenta e presion riba e necesidad pa atencion na adulto mayor. Cada bes ta presenta mas caso grave cu tin mester di cura y cuida, pero esaki no ta disponibel. Tin un scarsedad grandi di centro di cuida y e calidad di e servicio na e centronan di cuida actual no ta esun optimal. Alabes mayoria adulto mayor ta vulnerabel pa motibo financiero y no tin suficiente infraestructura pa garantiza nan participacion social debido

Kico Ta Nos Vision: Garantisa e acceso na un atencion adecua, servicio geriatrico y tratamiento prolonga pa tur hende grandi y sigura e disponibilidad di programa cu ta promove salud y bienestar, inclusion social, miho cuida, sosten moral y empodera poder di compra

Kico Nos Kier Haci:

- Inversion den vivienda adapta y adecua pa adulto mayor
- Trece accesibilidad bek na remedi
- Inverti den centro di cuida pa soluciona e retonan den termino debido
- Educacion continuo di conocimiento basico y avansa pa cuida di adulto mayor
- Garantisa cu casnan di cuida ta ofrece servicio di calidad
- Crea mas centro di actividad den tur districto
- Crea mas facilidad y parke pa movicion fisico
- Mehora e poder di compra di adulto mayor pa medio di, entre otro, reparatietoeslag
- Facilita acceso na transporte publico

TRANSPORTE, INCLUSION Y NOS BARIONAN

Kico Nos Ta Wak: No tur habitante di Aruba por participa completamente den nos sociedad. Un sociedad solamente por desaroya exitoso na momento cu tur ciudadano tin su participacion comunitario

Kico Ta Nos Vision: Apoyo pa tur hende por participa den actividadnan diario y desaroya libremente nan talento, capacidad y aspiracionnan pa contribui na nos comunidad. Ora ta papia di "participa den" y "contribui na" nos Aruba, tin tres aspecto clave:

- **Por participa** (capacidad di e individuo), **Kier participa** (motivacion di e individuo), **Permiso pa participa** (limitacion impone door di institucion/organizacion y infraestructura)

Kico Nos Kier Haci:

- Re-structura Arubus y inverti den un sistema di wijkbussen mas chikito y sostenibel cu orario gratis pa adulto mayor y hoben
- Restructura e rutanan pa brinda mas acceso na e gran mayoria di nos poblacion
- Inverti den tur bario pa medio di plan di mantencion di facilidad, centro y parkenan recreacional y re-construi/renoba facilidad deportivo pa movecion di persona di tur edad
- Organisa anochinan informativo di "bisiña activo" pa e mehoracion di nan bario
- Garantisa participacion educativo di tur hende den programa di cualificacion basico, formacion dual y capacitacion continuo y segundo oportunidad
- Inculca participacion social a traves di anima comunidad pa boluntarismo den asociacion, organizacion, actividad pa mucha y hoben den deporte y arte y promocion di e concepto di bon ciudadano
- Participacion di comunidad den politica publico door di organisa reunion den districto tocante decision di maneho
- Fortalece lasonan familiar dunando apoyo pa famia di criansa y stimula cuido mutuo
- Busca mas profesional pa duna training necesario na mayornan cu yiunan cu autismo y limitacion
- Hiba campaña structural den comunidad, en special den sector laboral, riba e importancia di participacion di persona autista of cu limitacion den tur sector
- Inverti y crea mas proyecto structural di "naschoolseopvang" pa mucha y hoben, alineando cu nos sistema di educacion y basa riba e desaroyo di nan habilidad y talentonan den arte, musica, teatro, creatividad y deporte
- Introduci un website cu bista riba tur actividad den bario
- Introduci loket pa brinda asistencia social y huridico na tur MFA

HUBENTUD Y DEPORTE

Kico Nos Ta Wak: E falta di participacion debido di nos hobennan den nos sociedad y den e proceso di tuma decision gubernamental ta afecta y impacta e desaroyo socio-economico y bienestar general di nos pais. No tin un structura pa apoyo emocional, ni tampoco un infrastructura cu ta garantiza suficientemente nan exito y proteccion durante infancia y hubentud

Kico Ta Nos Vision: Un comunidad caminda cu ideanan di futuro ta determina door di nos hobennan y un comunidad caminda tur hoben ta participa den sociedad pa medio di educacion, labor, deporte, boluntarismo y creatividad

Kico Nos Kier Haci:

- Un maneho structura cu ta ofrece segundo oportunidad den educacion pa hoben
- Incentiva y introduci certificacion di hoben cu ta activo den comunidad como boluntario
- Empodera nos hobennan y duna asistencia pa retonan cu salud mental y uzo di substancia cu programa di concientisacion den scol y tur fundacion/organizacion di y pa hobennan
- Plataforma nacional di dialogo di hoben den e proceso di e proximo decisionnan di gobierno, den forma di un Consejo Nacional di Hoben cu participacion regular den Consejo di Minister
- Inversion y plan di mantencion di facilidadnan deportivo
- Control mas estricto riba asociacionnan di deporte den codigo y conducta y finanzas;
- Restructura y investiga e uzo di fondo publico den deporte den ultimo 10 aña
- Centralisa registro y sosten pa mas capacitacion di boluntario, coach, trainer, referee, umpire activo den deporte
- Incentiva proyectonan di talento y creatividad den barionan acopla na un web-portal y app di actividad den distrito especificamente pa hoben
- Promove cursonan administrativo na dirigientenan di tur federacion y club
- Promove turismo cu ta sirbi deporte local incluso incentivo pa medio di Top-Sportster;
- Atrae y organisa mas torneo di reino y internacional na Aruba

Educacion y Labor pa TUR



EDUCACION

Kico Nos Ta Wak: E sistema educativo tin decadanan di retraso den curriculum y entrenamiento di personal. Directiva, maestro y docentenan tin mester di sosten den herment, recurso y capacitacion ademas di apoyo moral. No tin un oferta educativo flexibel cu ta adapta na e capacidad y aspiracion individual di nos mucha y hobennan

Kico Ta Nos Vision: Ta boga pa un sistema di educacion progresivo y prepara pa futuro. Esaki ta rekeri un strategia nacional di innovacion cla y un agenda digital cu ta cumpli cu e standardnan tanto nacional como internacional. FUTURO ta compromete na un legislacion orienta na e futuro cu ta habri caminda pa innovacion y segundo oportunidad pa tur nos ciudadanonan cu e enfasis principal basa riba e desaroyo social y academico di nos mucha y hobennan

Kico Nos Kier Haci:

- Revisa e estructura di salario di docente y bin cu un sistema di compensacion cu ta laga e docente sigui crece salarialmente y duna compensacion cu ta incentiva e docente pa sigui studia y inverti den su conocimiento
- Strategia nacional inclusivo di innovacion den educacion
- Inverti den e estructura di cuida pa tur scol por yega na tin un of mas SMW'er (Sociaal Maatschappelijk Werker), dependiendo di e necesidad di e scol y bario, y busca mas personal pa agilisa proceso di test na Multidisciplinaire Centrum (MDC)
- Habri dialogo riba reparticion di scol y cantidad di alumno den klas
- Adapta e curriculum pa sirbi e escenario di futuro, incluyendo e 21st Century Skills, ademas di ciencia, tecnologia, ingenieria y matematica (STEM)
- (Re-)capitacion di docente den forma di duna les, mas personalisa na e mucha su necesidad y drecha metodo y curriculum di Papiamento
- Ofrece curso continuo di Papiamento como idioma di instruccion y introduci numbe telefonico pa informacion necesario
- Alinea nos sistema di educacion na e demanda di mercado laboral y fomenta un comunidad critico y resiliente, specialmente inversion den beroepsonderwijs
- Restructura financiamiento di estudio avansa
- Crea mas oportunidad y estructura educacion pa segundo oportunidad na necesidadnan laboral
- Introduci sistema di acreditacion pa conocimiento vocational
- Capacitacion di tur personal den educacion den e area di agilidad, design thinking, innovacion y capacidad digital
- Crea un departamento encarga cu subsidio y fondo externo (p.e. Union Europeo) pa asisti scolnan cu entrega di proyecto dirigi riba innovacion y futuro
- Estructura e supervision riba les cu un enfoque riba modernisacion y crea miho traspaso (*overdracht*) entre kleuter, scol basico y secundario
- Acreditacion pa scolnan no tradicional cu no ta forma parti di e sistema Hulandes, pero ta cumpli cu standard di calidad

- Colaboracion cu sector priva y NGO pa comparti conocimiento, experiencia
- Empodera Bureau Leerplicht pa por haci control y funciona debidamente
- Un maneho fiho miho organisa pa muchanan na scol cu no tin permiso di estadia
- Inverti y restructura den sistema di educacion di scol primario y secundario cu un conexion debido y capacitacion di nos muchanan cu limitacion
- Introduci programa di aprendisahe pa facilita hoben cu experiencia profesional, bou guia di scol y habri caminda pa entrada den mercado laboral
- Inverti y re-structura EPI cu programa di estudio pa e necesidadnan di nos mercado laboral y di futuro

LABOR

Kico Nos Ta Wak: Un mercado laboral cu ta satura, mientras tin 3 hotel nobo pa habri. Ademá, tin un grupo grandi di persona indocumenta trahando den henter e sector. Nan no ta contribui den nos fondonan di AZV y SVB, sinembargo tin acceso na cuidu medico den caso di emergencia. Por último, un sistema di otorga permiso corumpi pa basta aña sin niun cambio

Kico Ta Nos Vision: Legalisa y flexibilisa e procedura di permiso. Hiba un maneho di migracion segun labor planea y registra a base di data y programa sincronisa cu e sectornan. Stimula participacion di tur den e mercado laboral. **FUTURO** no ta acepta discriminacion di ningun grupo

Kico Nos Kier Haci:

- Garantisa huridicamente cu e industria hotelero ta mas flexibel cu mayornan
- Dialogo riba proyecto piloto entre sector priva y gobierno tocante subsidio pa cuidu di mucha y hoben
- Flexibilisa y cambia ley pa crea mas oportunidad y garantiza trabou pa persona cu autismo of cualkier limitacion
- Introduci incentivo pa comercio ta mas activo cu programa di diversidad den nan personal pa medio di training y curso
- Digitalisa e proceso pa otorga permiso y trece mas transparencia den e necesidad di e mercado
- Duna doñonan di trabou grandi (> 100 empleado) mas autoridad y responsabilidad pa nan mes recruta personal cu nan departamento di recurso humano
- Departamento di Progreso Laboral (DPL) mester concentra riba empresa mediano y chikito y intensiva e control
- Introduci un ley pa ARBO
- Informa den extenso esunnan cu bin di exterior riba nan derecho y debernan
- Otorga tur persona indocumenta, cu tin prueba di trabou, un permiso temporal p'asina DIMAS por controla efectivamente
- Regla legalmente cu Directie Arbeid en Onderzoek (DAO) mester produci y publica regularmente e desaroyonan den mercado laboral encunto carera di empleado, comparacion di pago homber/muhe, salario pa funcion, etc
- Introduci un sistema digitalisa pa cada compania maneha su personal pa facilita informacion na DAO y mehora control di e inspectornan di labor

Siguridad pa TUR



HUSTICIA

Kico Nos Ta Wak: Tin un falta di confiansa den e poder hudicial, compaña pa falta di vision y strategia. No tin suficiente atencion pa prevencion, specialmente pa nos hobennan, y tampoco den maneho di adiccion. Sector di proteccion di frontera, departamentonan cu ta combati y preveni crimen organisa y corrupcion por uza mas apoyo

Kico Ta Nos Vision: Fomenta y restaura e confiansa di sociedad den e legitimidad di gobierno, specialmente den e tereno di husticia, calidad di bida na Aruba y e siguridad en general. Esaki ta posibel garantizando e integridad di gobierno, aplicando strategia formal y eficaz pa preveni y combati criminalidad, fortalece resiliencia y estado di derecho

Kico Nos Kier Haci:

- Fortalece resiliencia di hoben contra criminalidad mediante identificacion trempan y prevencion
- Colaboracion entre ministerio social, di cultura y deporte, pa brinda hobennan alternativanan atractivo, cu na mes momento ta yuda forma nan den ciudadanonan productivo di nos siguiente generacion
- Prevencion di adiccion trahando hunto cu fundacionnan pa brinda e cuadro necesario pa un servicio colaborativo eficiente y efectivo
- Prevencion di criminalidad lo ta central reduciendo recidivismo den delincuencia
- Brinda yudansa na esunnan cu problema di adiccion of trastorno psicologico pa nan rehabilitacion den comunidad y na beneficio di siguridad en general
- Mehora siguridad a traves di prevencion y sigui combati consumo, benta y trafico organisa di droga pa medio di concientisacion y actuacion represivo firme
- Fortalece proteccion di frontera a traves di accion preventivo y represivo
- Stop negoshi criminal y aumenta combatimento (gubernamental) di crimen organisa y corrupcion evitando y combatiendo efectonan di ondermijning riba nos sociedad
- Ekipa cu forza humano y material y empodera departamentonan cu ta combati ondermijning y corrupcion (gubernamental)
- Reforsa e posicion di Cuerpo Policial Aruba (KPA) y otro servicio di investigacion cu ekipo y entrenamiento
- Retiro di permiso y deportacion di individuo cu comete crimen
- Revisa y actualisa castigonan penal y multa
- Revisa y actualisa leynan di, entre otro, trafico
- Controla funcionamiento di nos departamentonan hudicial vital pa sigura cu nan in e vision, capacitacion y prosesonan necesario pa brinda nos comunidad e nivel mas haltu den e forma mas imparcial posibel
- Controla e composicion y organisacion di nos servicionan hudicial pa funciona mas efectivo y eficiente posibel

- Aumenta colaboracion regional y den Reino cu nos partners hudicial
- Restructuracion di KPA pa reduci overtime innecesario brindando personal ademas di procesonan mas optimalisa
- Inicia e proceso pa yega na construccion di un instituto di coreccion nobo
- Inverti den atrae, pa medio di un bon compensacion, mas trahado social
- Institui unidad di conseho nacional di decision entre trahadonan social y gobernantenan
- Structura un trayecto debido di re-integracion cu enfasis riba desaroyo educacional y vocacional di detenido, specialmente riba area di ingenieria y tecnologia

SIGURIDAD DI ANIMAL


Kico Nos Ta Wak: E siguridad y bienestar di tur animal no ta garantisa. E proteccion di animal ta hunga un papel fundamental den proteccion di nos biodiversidad. Especialmente pa cu acho y pushi, nos ta reconoce cu cualkier plan di accion ta keda rekeri e compromiso di henter comunidad. Aunke cu desde 2015 e ley di cacho a drenta na vigor, ainda 9 aña despues, e reto ta hopi grandi

Kico Ta Nos Vision: Un sociedad lidera pa empatia y compasion y basa riba respet pa cada persona su escogencia y unda cu tur persona ta contribui na mantene e diversidad biologico riba nos planeta

Kico Nos Kier Haci:

- Continua cu e introduccion di registracion obligatorio di cacho
- Empodera KPA den bario pa continua cu control necesario y duna multa ora no tin cumplimiento
- Programa structural na tur scol riba e importancia di proteccion di animal y kico esey ta nifica pa nos biodiversidad
- Centralisa liñanan di contacto entre organisacion/fundacion activo cu introduccion di un number di telefon central
- Pone fondo disponibel pa un programa di sterilisacion mas amplio y continuo

Sostenibilidad pa nos TUR



TRANSICION DI ENERGIA

Kico Nos Ta Wak: Un sobrepeso riba nos grid di coriente y na mesun momento un retraso den certificacion di proyecto di solar panels. Retraso den expansion di e capacidad di energia alternativo. Consecuencia cu gasto di utilidad ta demasiado halto pa gran parti di nos comunidad

Kico Ta Nos Vision: Amplia e capacidad di energia alternativo basa riba solo y biento. Di e manera aki por reduci structuralmente e gasto di coriente tradicional, mientras cu ta beneficia medioambiente cu menos uzo di crudo importa

Prioridad: Trece dentro di 6 luna un maneho di transicion di energia, indicando unda y con por establece energia alternativo, p'asina tin un base structural pa produccion di coriente. E plan aki mester indica tambe cua incentivo mester pa realisa e maneho aki y unda por acudi pa financiamiento di e inversionnan necesario

Kico Nos Kier Haci:

- Logra transicion di energia pa TUR ciudadano iniciando cu inversionan necesario den nos grid di distribucion
- Amplia capacidad di solo y di biento, incluyendo deposito descentraliza, pa reduci dependencia di petroleo importa
- Explora opcion pa energia di biento riba lama
- Explora energia alternativa adicional, manera ocean energy
- Programa di subsidio pa tur cas por haya panel solar
- Decarbonisa economia (reduci CO2)
- Plataforma pa carbon trading na Aruba
- Reemplasa combustibel fosil pa combustibel sintetico
- Evalua si Aruba lo sigui cu LNG

CUIDO DI MEDIO AMBIENTE

Kico Nos Ta Wak: Aruba ta enfrenta desafionan ambiental importante cu ta menasa su ecosistema delicado. Entre turismo, desaroyo urbano y cambio climatico, e isla a conoce un baymento atras di su habitat, contaminacion y perdida di biodiversidad. Tur esaki ta afecta nos pan y calidad di bida. Maneho di desperdicio, defensa di areanan natural y especienan invasor ta algun di e areanan di preocupacion

Kico Ta Nos Vision: Pa atende cu e desafionan aki, mester duna prioridad na practicanan sostenibel pa maneho di tera y awa sushi, actualisa y fortalece legislacion. Hunto cu NGO y comunidad mes, por crea zona proteha cu ta permiti e regeneracion di e ecosistema natural. Tambe mester reduci contaminacion, bin cu campananan masal di conscientisacion tanto pa local, como bishitante

Kico Nos Kier Haci:

- Educa nos comunidad riba e balor di nos naturaleza, y crea oportunidad pa participa den su proteccion y restauracion
- Proteha y restaura habitat importante pa salvaguardia nos biodiversidad y ecosistema
- Promove practicanan sostenibel den nos comunidad y diferente sector, pa reduci mal uzo di energia, awa y creacion di desperdicio
- Crea capacidad pa eherce y fortalece nos leyman ambiental
- Evaluacion di rekisito di zonificacion (ROPV)
- Enfoca riba uzo mas efectivo di tereno (ROPV)
- Maneho mas estricto pa cu aprobacion di uzo di espacionan unda por benta sushi
- Introduccion di ley di medio ambiente (milieuwet)
- Analisis y inventarisacion di tereno contamina, specialmente RdA y DUMP
- Planifica, den fase, e proceso di limpieza di tereno di RdA acopla na e gastonan necesario
- Control riguroso riba e desaroyo di traspaso y ehecucion di proyecto di RWZI



**Industria Creativo
Prospero pa TUR**

PROMOCION DI INDUSTRIA CREATIVO Y CULTURAL

Kico Nos Ta Wak: Tin un interes grandi di parti di nos talentonan local pa ta activo den e industria creativo y cultural y tin diferente iniciativa tumando lugar. Nos ta wak cu e industria creativo y cultural tin un potencial grandi, pero gobierno mester yuda pa e por yega su maximo potencial. Banco no ta financia empresario den e industria creativo y cultural, prijs di huur pa un espacio ta hopi halto y hopi biaha e burocracia ta demotiva of stroba e industria creativo y cultural

Kico Ta Nos Vision: Empodera nos comunidad y nos economia pa medio di inverti den y inculca creatividad y cultura den tur programa educacional. Laga musica, cine, literatura, diseño, moda, teatro, videogaming, etc. aporta na genera empleo, pero tambe contribui na desaroyo cultural y social di nos pais y pa medio di exportacion di nos obra y servicionan den e ramo aki, lo contribui tambe na mas entrada economico

Kico Nos Kier Haci:

- Reconoce y formalisa e industria cu implementacion di un maneho actualisa pa e Industria Creativo y Cultural/Orange Economy
- Inventarisa henter e Industria Creativo y Cultural (mapping)
- Crea un fondo pa financia proyecto y empresa den e Industria Creativo na un interes reduci (Creative Fund)
- Continua cu workshop pa empresario creativo y continua cu e Creative Business Academy entre Gobierno y Qredits
- Alineacion entre departamentonan gubernamental y fundacionnan subsidia pa gobierno activo den e sector
- Revisa uzo di fondo publico den e sector ultimo 10 aña y optimalisa e alocacion
- Introduci incentivo fiscal pa importacion di material, instrumento y tur otro artefacto necesario
- Incentivo fiscal pa stimula inversion den e sector
- Inverti den educacion y structura proyectonan cu artista pa nos scolnan
- Flexibilisa orario di trabou di trahadonan di sector publico cu por duna les of curso
- Structura programa di educacion riba skirbi proyecto pa peticion di fondo
- Identifica y map out tur oportunidad pa fondo local, regional, den reino y Union Europeo
- Incentiva y exige uzo di nos arte, musica y otro activida local den e industria hotelero

San Nicolas pa TUR



SAN NICOLAS PA TUR

Kico Nos Ta Wak: Un area industrial arcaico cu un refinaria obsoleto ofreciendo un maho bista ya pa decada; un centro di ciudad yen di edificio bashi y den mal estado y bario cu falta atencion y inversion

Kico Ta Nos Vision: Bring down the wall! Nos kier mira San Nicolas como e di 2 ciudad di nos pais cu tur forma di actividad social, artistico y economico y tambe unda e ciudadano di San Nicolas ta haya e oportunidad pa biba na un forma digno y cu e oportunidad economico pa e ciudadano di San Nicolas tambe por prospera

Kico Nos Kier Haci:

- Bring down the wall y inicia e desaroyo economico di 50.000m2 di tereno di refinaria, desde e retonde di Nicolas Store te cu lama y crea un boardwalk manera Linear Park, un fisherman's pier pa uzo recreativo y un waf di yate
- Desaroya San Nicolas como capital di arte, cultura y historia
- Stimula e Orange Economy den combinacion cu un programa di guia
- Actividad despues di scol cu diferente programa di educacion
- Introduci centro di actividad pa adulto mayor
- Re-purpose y converti edificio bashi/bandona pa vivienda y edificio pa actividad di arte, cultura, musica y historia
- Introduccion di incentivo fiscal pa atrae inversionista pa renoba e edificionan comercial den mainstreet y pa atrae mas desaroyo economico
- Facilita fondo entre gobierno y sector bancario pa financia e renobacion di edificio y business loans na un interes reduci
- Explora oportunidad cu Surinam y Guyana pa uzo di e tankinan riba tereno di refinaria como deposito di petroleo pa compania internacional
- Desmantela e infraestructura di refinaria y sanea e tereno
- Busca inversionista pa uza parti di e tereno di refinaria pa bitcoin mining
- Promove e parti di tereno contamina pa instala un parke di solar panel pa asina reduci e gasto di coriente pa comunidad
- Promove e parti di tereno cu no ta contamina pa construccion di vivienda
- Revamp un bario specifico pa the red light district y prohibi presencia riba tereno publico
- Continuacion di e proyecto Revitalisacion San Nicolas Fase 1, esta e renobacion di e area rond di postkantoor, Setar y Arubus
- Construccion di un waf pa carga di y pa e region manera Corsou, Boneiro, Surinam, Colombia y Republica Dominicana, tambe pa un fast ferry y tambe crucero
- Construccion di un Farmer's Market
- Bin cu un ley cu ta prohibi presencia di adicto ambulante riba caya of persona pa biba y drumi riba caya y percura pa reubica nan (dentro di 6 luna despues cu gobierno nobo sinta)

- Un unidad cu ta percura pa limpieza, mantenemento, entretenimento y mercadeo pa San Nicolas
- Un maneho general di precario pa San Nicolas pa asina tur comerciante sa di antemano unda nan por pone un terasa sin cu nan mester puntra un precario pa esaki y no lo cobra pa tin un terasa den centro di San Nicolas
- Instalacion di mas baño publico
- Maneho di parkeo na beneficio di henter San Nicolas
- Renobacion y mantenimiento di facilidadnan deportivo y barionan
- Construcccion di un stage permanente den Carnaval Village pa por organisa evento grandi di cultura, Carnaval, concierto, etc
- Crea un aliansa cu Aruba Tourism Authority (ATA) y e industria hotelero pa trece turista algun biaha pa siman San Nicolas
- DIP mester duna prioridad pa entrega tereno di erfpacht den e region di San Nicolas
- Trece mas departamento gubernamental bek den e districto

Oranjestad pa TUR



ORANJESTAD PA TUR

Kico Nos Ta Wak: Nos ta wak cu sector priva ta kere bek den centro di Oranjestad y ta kere den e concepto pa revitalisa centro di Oranjestad como un centro unda hende ta biba y traha, cu oportunidad pa retail, cafe, terasa y restaurant. Nos ta wak si cu tin hopi reto, manera parkeo adecua y molester cu adicto ambulante ta causa. Falta tambe un unidad cu ta percursa pa limpieza, mantenimiento, entretenimento y mercadeo di Oranjestad. Nos ta wak hopi edificio bandona y nos ta wak cu mester continua cu e renobacion di caya, manera e area di Columbusstraat y Wilheminastraat

Kico Ta Nos Vision: Nos ta premira un centro di Oranjestad unda estudiante, young professionals, adulto mayor y turista por biba riba e di dos piso, mientras cu riba e prome piso tin un combinacion di espacio pa oficina, retail, cafe, terasa, bar y restaurant. Asina, continuamente tin presencia di local y turista, durante dia y anochi, aportando na un centro di ciudad unda semper tin ambiente. Tur edificio renoba y den uzo y tur caminda renoba, cu luz, mata y semper limpi y safe

Kico Nos Kier Haci:

- Renoba tur caya di Oranjestad, incluyendo trottoir y instalacion di luz, bak'i sushi, banki pa sinta y hopi mata y flor (dentro di 2 aña despues cu gobierno nobo sinta)
- Bin cu un ley cu ta prohibi presencia di adicto ambulante riba caya of persona pa biba y drumi riba caya y percursa pa reubica nan (dentro di 6 luna despues cu gobierno nobo sinta)
- Un unidad di patrulla di polis specialmente pa Oranjestad pa tin siguridad continuo pa tur ciudadano, bishitante y empresario
- Un unidad cu ta percursa pa limpieza, mantenimiento, entretenimento y mercadeo pa Oranjestad
- Un maneho general di precario pa Oranjestad pa asina tur comerciante sa di antemano unda nan por pone un terasa sin cu nan mester puntra un precario pa esaki y no lo cobra pa tin un terasa den centro di Oranjestad
- Instalacion di mas baño publico
- Renoba e area di lagoen
- Pakete di incentivo fiscal pa stimula inversion den edificio
- Introduci un subsidio di huur pa stimula vivienda riba e di dos piso di edificio, specialmente pa estudiante, young professionals y adulto mayor
- Converti Oranjestad den un zona liber
- Permiti pa huur e di dos piso di e edificionan na turista como vacation rentals
- Duna e tereno di ex Texas den erfpacht na sector priva pa construccion di un edificio mixto consistiendo di 3 pa 4 piso di parkeo y vivienda
- Permiti pa sector priva desaroya e edificio di ex warda di polis den Wilhelminastraat
- Un maneho di parkeo na beneficio di henter Oranjestad
- Bin cu un ferris wheel pa Oranjestad